

ԿԱՆՈՆԱԴՐՈՒԹՅՈՒՆ

ԵՐԵՎԱՆԻ ԱՎԱԳԱՆՈՒ «ՄԱՅՐ ՀԱՅԱՍՏԱՆ» ԽՄԲԱԿՑՈՒԹՅԱՆ

1. ԸՆԴՀԱՆՈՒՐ ԴՐՈՒՅԹՆԵՐ

- 1.1 Երևան քաղաքի ավագանու ՄԱՅՐ ՀԱՅԱՍՏԱՆ խմբակցությունը, այսուհետ՝ խմբակցություն, ստեղծվում է նորընտիր ավագանու առաջին նստաշրջանի բացման օրը,
- 1.2 «Մայր Հայաստան» շարժման, «Ինտելեկտուալ Հայաստան» և «Երկիր Ծիրանի» կուսակցությունների կողմից միացյալ ուժերով հիմնադրված «Մայր Հայաստան» դաշինքը 2023 թվականի սեպտեմբերի 17-ի Երևանի ավագանու ընտրությունների արդյունքում ստացել է 12 մանդատ: Մանդատ ստացած ավագանու անդամները միասին կազմում են ՄԱՅՐ ՀԱՅԱՍՏԱՆ խմբակցությունը,
- 1.3 Խմբակցությունը գործում է ՀՀ Սահմանադրությանը, «Երևան քաղաքում տեղական ինքնակառավարման մասին», «Տեղական ինքնակառավարման մասին» ՀՀ օրենքներին, Երևան քաղաքի ավագանու կանոնակարգին, այլ իրավական ակտերին, դաշինքի նախընտրական ծրագրին և սույն կանոնադրությանը համապատասխան:

2. ԽՄԲԱԿՑՈՒԹՅԱՆ ԳՈՐԾՈՒՆԵՈՒԹՅՈՒՆԸ

- 2.1 Խմբակցությունն իր գործունեությունն իրականացնում է Հայաստանի Հանրապետության Սահմանադրությանը, «Երևան քաղաքում տեղական ինքնակառավարման մասին» Հայաստանի Հանրապետության օրենքին, Երևան քաղաքի ավագանու կանոնակարգին, այլ իրավական ակտերին, դաշինքի նախընտրական ծրագրին և սույն կանոնադրությանը համապատասխան,
- 2.2 Խմբակցությունն իր աշխատանքները կազմակերպում է հերթական և արտահերթ նիստերի միջոցով, որոնց ընթացքում անցկացվում են քննարկումներ և օրակարգային հարցերի վերաբերյալ կայացվում են որոշումներ,
- 2.3 Խմբակցության գործունեության հիմնական սկզբունքներն են.
 - 1) ժողովրդավարությունը,
 - 2) բազմակարծությունը,
 - 3) փոխադարձ հարգանքը խմբակցության ներսում,
 - 4) փոխօգնությունը խմբակցության անդամների միջև,
 - 5) հետևողականությունը,
 - 6) մարդակենտրոնությունը,

- 7) գործունեության թափանցիկությունը,
- 8) նախաձեռնողականությունը,
- 9) հաշվետվողականությունը ՄԱՅՐ ՀԱՅԱՍՏԱՆ դաշինքին և ՀՀ քաղաքացիներին:

3. ԽՄԲԱԿՑՈՒԹՅԱՆ ՂԵԿԱՎԱՐԸ

- 3.1 ղեկավարում է Խմբակցության գործունեությունը,
- 3.2 ապահովում է Խմբակցության բնականոն գործունեությունը,
- 3.3 նախապատրաստում և վարում է Խմբակցության նիստերը,
- 3.4 կազմում և Խմբակցության անդամների հաստատմանն է ներկայացնում Խմբակցության նիստի օրակարգը,
- 3.5 համակարգում է Խմբակցության աշխատանքային խմբերի աշխատանքը,
- 3.6 Երևանի ավագանիում հարցի քվեարկությունից առաջ անհրաժեշտության դեպքում պահանջում է ընդմիջում՝ մինչև տասնհինգ րոպե տևողությամբ,
- 3.7 բանակցություններ է վարում Երևանի ավագանու այլ Խմբակցությունների և ավագանիների հետ՝ ՄԱՅՐ ՀԱՅԱՍՏԱՆ Խմբակցության նախաձեռնությունները պաշտպանելու և համատեղ քննության առարկա հանդիսացող հարցերին անդրադառնալու համար,
- 3.8 ներկայացնում է ՄԱՅՐ ՀԱՅԱՍՏԱՆ Խմբակցության շահերը Երևանի քաղաքապետարանում,
- 3.9 կազմակերպում և վարում է Խմբակցության փաստաթղթաշրջանառությունը և նամակագրությունը, այդ թվում նաև Խմբակցության նիստերի արձանագրությունների պահպանությունը, կազմակերպում է քաղաքացիների հետ հանդիպումները Խմբակցության ավագանիների և փորձագետների հետ՝ ըստ Խմբակցության կողմից սահմանված գրաֆիկի,
- 3.10 կատարում է Օրենքով և Խմբակցության կանոնադրությամբ սահմանված այլ գործառույթներ,
- 3.11 հաշվետու է Խմբակցությանը և ՀՀ քաղաքացիներին:

4. ԽՄԲԱԿՑՈՒԹՅԱՆ ՔԱՐՏՈՒՂԱՐԸ

- 4.1 Խմբակցության ղեկավարի բացակայության ժամանակ փոխարինում է ղեկավարին և օրենքով իրեն վերապահված լիազորությունների շրջանակում գործում ի շահ Խմբակցության,
- 4.2 Խմբակցության ղեկավարի հանձնարարությամբ կամ գիտությամբ՝ հրավիրում և վարում է Խմբակցության նիստերը,
- 4.3 նախապատրաստում է Խմբակցության նիստերը,
- 4.4 վերահսկում է Խմբակցության գործավարությունը,
- 4.5 կատարում է սույն կանոնադրությամբ սահմանված այլ գործառույթներ,
- 4.6 հաշվետու է ՄԱՅՐ ՀԱՅԱՍՏԱՆ Խմբակցությանը և ՀՀ քաղաքացիներին:

5. ԽՄԲԱԿՑՈՒԹՅԱՆ ԱՆԴԱՄԸ

- 5.1 իրավունք ունի Խմբակցության նիստում քննարկվող հարցի վերաբերյալ հարցեր տալու, առաջարկություններով և նախաձեռնություններով հանդես գալու, ելույթ ունենալու և իր դիրքորոշումը հայտնելու,
- 5.2 իրավունք ունի Խմբակցության կամ դրա ղեկավարի որոշմամբ կամ գիտությամբ Խմբակցության անունից արտահայտել դիրքորոշումներ, տալ հարցազրույցներ, վարել բանակցություններ,
- 5.3 իրավունք ունի Խմբակցության և նրա ղեկավարին՝ ներկայացնել նախագծեր, առաջարկություններ և նախաձեռնություններ,
- 5.4 իրավունք ունի հաշվետվություն պահանջել Խմբակցության գործունեության մասին,
- 5.5 իրավունք ունի ՀՀ օրենսդրությամբ՝ Երևանի ավագանու կանոնակարգով, իրավական ակտերով սահմանված կարգով և սույն կանոնադրության համաձայն իրականացնել այլ գործառույթներ,
- 5.6 մասնակցում է Երևան քաղաքի ավագանու, ավագանու հանձնաժողովների և Խմբակցության նիստերին, իսկ բացակայության դեպքում՝ այդ մասին նախապես տեղյակ է պահում Խմբակցության ղեկավարին, կամ ըստ իրավիճակի՝ քարտուղարին,
- 5.7 պարտավոր է իր գործունեությամբ ու վարքով բարձր պահել Խմբակցության հեղինակությունը,
- 5.8 պարտավոր է պարբերաբար հանդիպել համայնքի բնակչության հետ, համայնքի ընտրողներին տեղեկացնել Խմբակցության և Երևանի ավագանու աշխատանքների մասին,
- 5.9 պարտավոր է ուսումնասիրել քաղաքացիներից ստացված առաջարկությունները և պատասխանել դիմումներին,
- 5.10 պարտավոր է կատարել ավագանու՝ Օրենքով սահմանված գործառույթները, կանոնադրության պահանջները և Խմբակցության որոշումները,

6. ԽՄԲԱԿՑՈՒԹՅԱՆ ՆԻՍՏԵՐԸ

- 6.1 Խմբակցության հերթական նիստերը հրավիրվում են ավագանու նստաշրջանների ընթացքում՝ ամիսը առնվազն մեկ անգամ՝ Խմբակցության ղեկավարի կողմից:
- 6.2 Խմբակցության ղեկավարի կամ անդամների մեկ երրորդի նախաձեռնությամբ կարող են հրավիրվել նաև Խմբակցության արտահերթ նիստեր,

- 6.3 Հերթական նիստի անցկացման ժամանակի, վայրի և օրակարգի մասին Խմբակցության անդամները ծանուցվում են հեռախոսազանգի և/կամ կարճ հաղորդագրության և/կամ էլեկտրոնային փոստի միջոցով՝ նիստից առնվազն 2 օր առաջ,
- 6.4 Խմբակցության նիստերի անցկացման վայրն է Երևանի քաղաքապետարանի շենքը (Երևան, Արգիշտի 1): Խմբակցության անդամների մեծամասնության համաձայնության դեպքում Խմբակցության նիստը կարող է գումարվել նաև այլ վայրում,
- 6.5 Խմբակցության նիստը վարում է Խմբակցության ղեկավարը, իսկ նրա բացակայության դեպքում՝ Խմբակցության քարտուղարը,
- 6.6 Խմբակցության ղեկավարի և քարտուղարի բացակայության դեպքում նիստը վարում է Խմբակցության տարիքով ավագ անդամը,
- 6.7 Հրատապ նիստերի անցկացման դեպքում ծանուցումն ապահովվում է առնվազն 1 ժամ առաջ՝ էլեկտրոնային փոստի և/կամ հեռախոսազանգի միջոցով,
- 6.8 Խմբակցության նիստն իրավազոր է, եթե նիստին մասնակցում են Խմբակցության անդամների կեսից ավելին,
- 6.9 Խմբակցության նիստում կարող է քննարկվել Երևանի ավագանու իրավասություններին, գործունեության և լիազորություններին վերաբերող ցանկացած հարց,
- 6.10 Խմբակցության նիստի օրակարգում ընդգրկված հարցերը քննարկվում են հետևյալ ընթացակարգով.
1) օրակարգի հաստատում,
2) քննարկվող հարցի վերաբերյալ զեկուցողի ելույթը,
3) հարցեր զեկուցողին,
4) մտքերի փոխանակություն,
5) քվեարկություն,
- 6.11 Նիստում յուրաքանչյուր հարցի վերաբերյալ քվեարկությունը կատարվում է այդ հարցի քննարկման ավարտից անմիջապես հետո: Խմբակցության նիստում որոշումներն ընդունվում են, եթե դրանց կողմ են քվեարկել նիստին ներկա Խմբակցության անդամների կեսից ավելին: Քվեարկության արդյունքում ձայները հավասար բաշխվելու դեպքում վճռորոշ է համարվում նիստը վարողի դիրքորոշումը,
- 6.12 Նիստի արձանագրությունը, որը ներառում է Խմբակցության նիստում քննարկված բոլոր հարցերի քվեարկությունների անհատական արդյունքները, ստորագրում են նիստի մասնակից Խմբակցության անդամները: Քվեարկությունն ընթանում է բաց ընթացակարգով: Հատուկ դեպքերում կարող է լինել փակ քվեարկություն: Փակ քվեարկություն անցկացնելու որոշումը կայացվում է բաց քվեարկության միջոցով,

- 6.13 Խմբակցության ղեկավարի կամ մեկ երրորդի առաջարկությամբ նիստին կարող են մասնակցել նաև քննարկվող հարցերին իրազեկ անձինք կամ մասնագետներ,
- 6.14 Խմբակցության նիստին կարող է մասնակցել նաև Խմբակցության փորձագետը, ով ներկայացնում է իր ուսումնասիրություններն ու փորձագիտական եզրակացությունները:
- 6.15 Խմբակցության նիստին մասնակցում է Խմբակցության գործավարը, ով սղագրում է նիստը և ապահովում նիստի կազմակերպման տեխնիկական մասը:

7. ԽՄԲԱԿՑՈՒԹՅԱՆ ԿԱՆՈՆԱԴՐՈՒԹՅԱՆ ԸՆԴՈՒՆՈՒՄԸ ԵՎ ՓՈՓՈԽՈՒԹՅՈՒՆԸ

- 7.1 Խմբակցության կանոնադրությունում փոփոխություններ և լրացումներ կատարվում են Խմբակցության ղեկավարի կամ անդամի առաջարկությամբ՝ Խմբակցության անդամների ընդհանուր թվի ձայների պարզ մեծամասնությամբ,
- 7.2 Խմբակցության կանոնադրության մեջ փոփոխություններ կատարելու վերաբերյալ առաջարկությունները Խմբակցության նիստում քննարկվում են արտահերթ,
- 7.3 Սույն կանոնադրությունը ուժի մեջ է մտնում ընդունման պահից: